

Tala a Geroge Rickford

I le 1969, na fetau ai George Rickford, o se talavou matua e nofo i Leicester, Egelani, ma faifeautalai mai Le Ekalesia a Iesu Keriso o le Au Paia o Aso e Gata Ai. Na teena i le taimi muamua e George le la savali, ae na iu lava ina amata ona latou feiloai ma faifeautalai. Ina ua mavae le tolu masina o suesuega filigā, na ala ae George i se tasi taeao ma se talitonuga maumaututu e moni le Ekalesia.

Na naunau George e faasoa atu lana molimau fou i faifeautalai. Ae na te lei faasoa atu, sa ta’u atu e faifeautalai ia te ia o le a le agavaa o ia e maua le perisitua o se tagata o le Ekalesia ona o lona tupuaga fefiloi, lea e aofia ai tuua e tupuga mai tagata uli Aferika.

I se tasi aso, sa talanoa ai George ma se uo mamae e uiga i ona aafiaga ma faifeautalai ma amata ona aoaoina lana uo e uiga i le Perofeta o Iosefa Samita. Na ia manatuaina, “A o ou faamatala atu lena tala, na segia a’u ma suia faafuase’i lagona ma sa ou matuai fiafia.”

O le aafiaga na toe faamautuina ai le molimau a George, ae o ona atugaluga e uiga i le tapulaa o le perisitua na tumau pea. A o ia tatalo mo se malamalama atili, na oo mai lenei savali ia te ia: “E te le tau malamalama i mea uma e uiga i la’u talalelei ae e te lei tuuto atu oe lava i ai. Aisea e te le faaaliga ai lou faatuatua e ala i le talia o mea ua e faalogo i ai ma tuu mai mea o totoe i o’u lima?”

I le faamafanafanaina ai e le savali, na tali atu ma le agaga tatalo George, “Ioe, Le Alii e, o le a ou faia. O le a ou talia ma le faatuatua. Ma le isi mea, faafetai, faafetai lava.” I le lua masina mulimuli ane, na papatiso ai George ma avea ma se tagata faamaoni o le Ekalesia.

I le 1975, i le tolu tausaga a o lei oo i le faaaliga e uiga i le perisitua, sa faaaliga ai e George lona talitonuga i se Atua amiotonu, ma tusia ai faapea sa ia taliaina le tapulaa “i le faatuatua, e aunoa ma se faatuai.” Sa ia faaopoopo mai, “Ou te faafetai lava ona ua toe i ai le perisitua a le Alii i luga o le fogaeleele, ma ona faamanuiaga uma, pule, ma tiutetauave. E le afaina ia te a’u po o ai o i ai ma o ai e le o i ai, ae matua sili atu le auala o faaogaina ai.”

I le 1978 na iloa ai e George le faaaliga na tuuina atu ai le perisitua i alii agavaa uma (tagai Folafolaga Aloaia 2). “Ina ua foi atu George i le fale, sa la talanoa ma June [lana avā] i le po atoa i le uiga o le talafou mo lo latou aiga. Sa mataina le suiga. I le taeao na sosoo ai, na faauuina ai George Rickford o se ositaulaga i le Perisitua Arona. I le lua masina mulimuli ane, sa faauuina ai o ia o se Fitugafulu, ma sa avea ma sui sinia o le korama a Fitugafulu o le siteki. Ma i le lua masina mulimuli ane, na faamauina ai George ma June Rickford i le Malumalu o Lonetona Egelani, faatasi ma le la fanau e toafa” (“I Will Take It in Faith”).